

仲景全書

上海千頃堂書局印行

民國五年春校印

仲景全書

傷寒論集注十卷

傷寒類證三卷

傷寒明理論三卷

金匱要略方論三卷

運氣掌訣錄一卷

附藥方論

仲景全書序

歲乙未吾邑疫癘大作予家藏獲率六七就枕席吾吳和緩明卿沈君南昉在海虞藉其力而起死亡殆徧予家得大造於沈君矣不知沈君搃何術而若斯之神因詢之君曰予豈探龍藏秘典剖青囊奧旨而神斯也哉特于仲景之傷寒論窺一斑兩斑耳予曰吾聞是書于家大夫之日久矣而書肆間絕不可得君曰予誠有之予讀而知其為成無已所解之書也然而魚亥不可正句讀不可離矣已而購得數本字為之正句為之離補其脫略訂其舛錯沈君曰是可謂完書仲景之忠臣也予謝不敏先大夫命之爾其板行斯以惠厥同胞不肖孤曰唯唯沈君曰金匱要略仲景治雜證之秘也蓋并刻之呂見古人攻擊補瀉緩急調停之心法先大夫曰小子識之不肖孤曰敬哉既合刻則名何從先大夫曰可哉命之名仲景全書既刻已復得宋板傷寒論焉予曩固知成注非全文及得是書不啻拱壁轉卷間而後知成之荒也因復并刻之所以承先大夫之志也又故紙中檢得傷寒類證三卷所以彙括仲景之書去其煩而歸之簡聚其散而彙之一其于病證脈方若標月指之明且盡仲景之法于是粲然無遺矣乃并附于後予因是哀夫世之人向故不得盡命而死也夫仲景殫心思于軒岐辨證候于綵髮著為百十二方以全民命斯何其仁且愛而躋一世

於仁壽之域也乃今之業醫者舍本逐末超者曰東垣局者曰丹溪已矣而最稱高識者則玉機微義是宗若素問若靈樞若玄珠密語則嗒茫乎而不知旨歸而語之以張仲景劉河間幾不能知其人與世代猶覲然曰吾能已病足矣奚高遠之是務且於今之讀軒岐書者必加誚曰是夫也徒讀父書耳不知兵變也夫不知變者世誠有之以其變之難通而遂棄之者是猶食而咽也去食以求養生者哉必且不然矣則今日是書之刻烏知不為肉食者大嗤乎說者謂陸宣公達而以奏疏醫天下窮而聚方書以醫萬民吾子固悠然有世思哉予曰不之是先大夫之志也先大夫固嘗以奏疏醫父子之倫醫朋黨之漸醫東南之民瘼以直言敢諫醫諂諛者之膏肓故躋之日多達之日少而是書之刻也其先大夫宣公之志與今先大夫歿垂四年而書成先大夫處江湖退憂之心蓋與居廟堂進憂之心同一無窮矣客曰子實為之而以為先公之志殆所謂善則稱親與不肖孤曰不知是先大夫之志也

萬厯己亥三月穀旦海虞清常道人趙開美序

註解傷寒論序

夫前聖有作後必有繼而述之者則其教乃得著於世矣醫之道源自炎黃以至神之妙始興經方繼而伊尹以元聖之才撰成湯液俾黎庶之疾疢咸遂蠲除使萬代之生靈普蒙拯濟後漢張仲景又廣湯液為傷寒卒病論十數卷然後醫方大備茲先聖後聖若合符節至晉太醫令王叔和以仲景之書撰次成序得為完秩昔人以仲景方一部為眾方之祖蓋能繼述先聖之所作迄今千有餘年不墜於地者又得王氏闡明之力也傷寒論十卷其言精而奧其法簡而詳非寡聞淺見所能蹟究後雖有學者又各自名家未見發明僕忝醫業自幼徂老耽味仲景之書五十餘年矣雖粗得其門而近升乎堂然未入於室常為之慊然昨者解后聊攝成公議論該博術業精通而有家學註成傷寒論十卷出以示僕其三百九十七法之內分析異同彰明隱奧候陳脈理區別陰陽使表裏以昭然俾汗下而灼見百一十二方之後通明名號之由彰顯藥性之主十劑輕重之攸分七精制用之斯見別氣味之所宜明補瀉之所適又皆引內經旁牽眾說方法之辨莫不允當寔前賢所未言後學所未識是得仲景之深意者也昔所謂慊然者今悉達其奧矣親覲其書誠難默默不揆荒蕪聊序其畧時甲子中秋日洛陽嚴器之序

傷寒論後序

夫治傷寒之法歷觀諸家方書得仲景之多者惟孫思邈猶日見太醫療傷寒惟大青知母等諸冷物投之極與仲景本意相反又曰尋方之大意不過三種一則桂枝二則麻黃三則青龍凡療傷寒不出之也嗚呼是未知法之深者也嘗攷仲景之意治病發於陽者以桂枝生姜大棗之類發於陰者以乾薑甘草附子之類非謂全用溫熱藥蓋取素問辛甘發散之說且風與寒非辛甘不能發散之也而又中風自汗用桂枝傷寒無汗用麻黃中風見寒脈傷寒見風脈用青龍若不知此欲治傷寒者是未得其門矣然則此之三方春冬所宜用之若夏秋之時病多中暍當行白虎也故陰陽大論云脈盛身寒得之傷寒脈虛身熱得之傷暑又云五月六月陽氣已盛為寒所折病熱則重別論云太陽中熱暍是也其人汗出惡寒身熱而渴白虎主之若誤服麻黃桂枝輩未有不黃發斑出脫血而得生者此古人所未至故附于卷之末云

傷寒卒病論集

論曰予每覽越人入統之診觀齊侯之色未嘗不慨然歎其才秀也怪當今居世之士曾不留神醫藥精究方術上以療君親之疾下以救貧賤之厄中以保身長全以養其生但競逐榮勢企踵權豪孜孜汲汲惟名利是務崇飾其末忽棄其本華其外而悴其內皮之不存毛將安附焉卒然遭邪風之氣嬰非常之疾患及禍至而方震慄降志屈節欽望巫祝告窮歸天束手受敗費百年之壽命持至貴之重器委付凡醫恣其所措咄嗟嗚呼厥身已斃神明消滅變為異物幽潛重泉徒為啼泣痛夫舉世昏迷莫能覺悟不惜其命若是輕生彼何榮勢之云哉而進不能愛人知人退不能愛身知己遇災值禍身居厄地蒙蒙昧昧憊若遊魂哀乎超世之士馳競浮華不固根本忘軀徇物危若冰谷至於是也余宗族素多向餘二百建安紀年以來猶未十稔其死亡者三分有二傷寒十居其七感往昔之淪喪傷橫天之莫救乃勤求古訓博采衆方撰用素問九卷八十一難陰陽大論胎臚藥錄并平脈辨證為傷寒雜病論合十六卷雖未能盡愈諸病庶可以見病知源若能尋余所集思過半矣夫天布五行以運萬類人稟五常以有五臟經絡腑俞陰陽會通玄冥幽微變化難極自非才高識妙豈能探其理致哉上古有神農黃帝岐伯伯高雷公少俞少師仲文中世有

長桑扁鵲漢有公乘陽慶及倉公下此以往未之聞也觀今之醫不念思求經旨以演其所知各承家技終始順舊省疾問病務在口給相對斯須便處湯藥按寸不及尺握手不及足人迎跌陽三部不參動數發息不滿五十短期未知決診九候曾無髣髴明堂闕庭盡不見察所謂窺管而已夫欲視死別生實為難矣孔子云生而知之者上學則亞之多聞博識知之次也余宿尚方術請事斯語漢長沙太守南陽張機著

傷寒論序

夫傷寒論蓋祖述大聖人之意諸家莫其倫擬故晉皇甫謐序甲乙鍼經云伊尹以元聖之才撰用神農本草以為湯液漢張仲景論廣湯液為十數卷用之多驗近世太醫令王叔和撰次仲景遺論甚精皆可施用是仲景本伊尹之法伊尹本神農之經得不謂祖述大聖人之意乎張仲景漢書無傳見名醫錄云南陽人名機仲景乃其字也舉孝廉官至長沙太守始受術於同郡張伯祖時人言識用精微過其師所著論其言精而奧其法簡而詳非淺聞寡見者所能及自仲景于今八百餘年惟王叔和能學之其間如葛洪陶景胡洽徐之才孫思邈輩非不才也但各自名家而不能修明之開寶中節度使高繼沖曾編錄進上其文理科錯未當考正歷代雖藏之書府亦闕於讐校是使治病之流舉天下無或知者國家詔儒臣校正醫書奇續被其選以為百病之急無急於傷寒今先校定張仲景傷寒論十卷總二十二篇證外合三百九十七法除復重定有一百一十二方今請頒行太子右贊善大夫高保衡尚書屯田員外郎臣孫奇尚書司封郎中充秘閣校理臣林億等謹上

國子監

准 尚書禮部元祐三年八月八日符元祐三年八月七日酉時准 都省送下當月六日

勅中書省勘會下項醫書冊數重大紙墨價高民間難以買置八月一日奉聖旨令國子監別作小字雕印內有浙路小字本者令所屬官司校對別無差錯印摹印雕版並候了日廣行印造只收官紙工墨本價許民間請買仍送諸路出賣奉

勅如右牒到奉行前批八月七日未時司禮部施行續准

禮部符元祐三年九月二十日准

都省送下當月十七日

勅中書省尚書省送到國子監狀據書庫狀准

朝旨雕印小字傷寒論等醫書出賣契勘工錢約支用五千餘貫未委於是何官錢支給應副使用本監此欲依雕四子等體例於書庫賣書錢內借支又緣所降

朝旨候雕造了日令只收官紙工墨本價即別不收息慮日後難以撥還欲乞朝廷特賜應副上件錢數支使候指揮尚書省勘當欲用本監見在賣書錢候

將來成書出賣每部只收息壹分餘依元降指揮奉

聖旨依國子監生者一依

勅命指揮施行

治平二年二月四日

進呈奉

聖旨鏤板施行

朝奉郎守太子右贊善大夫同校正醫書飛騎尉賜緋魚袋臣高保衡

宣德郎守尚書都官員外郎同校正醫書騎都尉臣孫奇

朝奉郎守尚書司封郎中充秘閣校理判登聞檢院護軍賜緋魚袋臣林

億

翰林學士朝散大夫給事中知制誥充史館修撰宗正寺修玉牒官兼判太

常寺兼禮儀事兼判秘閣秘書省同提舉集禧觀公事兼提舉校正醫

書所輕車都尉汝南郡開國侯食邑一千三百戶賜紫金魚袋臣范鎮

推忠協謀佐理功臣金紫光祿大夫行尚書吏部侍郎參知政事柱國天水

郡開國公食邑三千戶食實封八百戶臣趙鼎

推忠協謀佐理功臣金紫光祿大夫行尚書吏部侍郎參知政事柱國樂安

郡開國公食邑二千八百戶食實封八百戶

臣歐陽脩

推忠協謀同德佐理功臣特進行中書侍郎兼戶部尚書同中書門下平章事集賢殿大學士上柱國廬陵郡開國公食邑七千一百戶食實封二

千二百戶

臣曾公亮

推忠協謀同德守正佐理功臣開府儀同三司行尚書右僕射兼門下侍郎

同中書門下平章事昭文館大學士兼脩國史兼譯經潤文使上柱國

衛國公食邑一萬七百度戶食實封三千八百戶

臣韓琦

知兗州錄事參軍監國子監書庫

臣郭直卿奉議郎國子監主簿雲騎尉

臣孫準

朝奉郎行國子監丞上騎都尉賜緋魚袋

臣何宗元

朝奉郎守國子司業輕車都尉賜緋魚袋

臣豐稷

朝請郎守國子司業上輕車都尉賜緋魚袋

臣盛儔

朝請大夫試國子祭酒直集賢院兼徐王府翊善護軍

臣鄭穆

中大夫守尚書右丞上輕車都尉保定縣開國男食邑三百戶賜紫金魚袋

臣胡宗愈

中大夫守尚書左丞上護軍太原郡開國侯食邑一千八百戶食實封二百

戶賜紫金魚袋臣王存

中大夫守中書侍郎護軍彭城郡開國侯食邑一千一百戶食實封二百戶

賜紫金魚袋臣劉摯

正議大夫守門下侍郎上柱國樂安郡開國公食邑四千戶食實封九百戶

臣孫固

太中大夫守尚書右僕射兼中書侍郎上柱國高平郡開國侯食邑一千六

百戶食實封五百戶臣范純仁

太中大夫守尚書左僕射兼門下侍郎上柱國汲郡開國公食邑三千九百

戶食實封六百戶臣呂大防

醫林列傳

張機

東漢獻帝建安中
人日本仲夏天皇

張機字仲景南陽人也受業於同郡張伯祖善於治療尤精經方舉孝廉官至長沙太守後在京師為名醫於當時為上手以宗族二百餘口建安紀年以來未及十稔死者三之二而傷寒居其七乃著論二十二篇證外合三百九十七法一百一十二方其文辭簡古奧雅古今治傷寒者未有能出其外者也其書為諸方之祖時人以為扁鵲倉公無以加之故後世稱為醫聖

王叔和

王叔和高平人也性度沉靜博好經方尤精診處洞識養生之道深曉療病之源採摭羣論撰成脈經十卷敘陰陽表裏辨三部九候分人迎氣口神門條十二經二十四氣奇經八脈五臟六腑三焦四時之病纖悉備具咸可按用凡九十七篇又次張仲景方論為三十六卷大行於世

成無已

成無已聊攝人家世儒醫性識明敏記問該博撰述傷寒義皆前人未經道者指在定體分形析證若同而異者明之似是而非者辨之古今言傷寒者祖張仲景但因其證而用之初未有發明其意義成無已博極研精深造自得本難

素問靈樞諸書以發明其奧因仲景方論以辨析其理極表裏虛實陰陽死生之說究藥病輕重去取加減之意真得長沙公之旨趣所著傷寒論十卷明理論二卷藥方論一卷類證三卷大行於世